



Ulloq 1. maj 2020

**Inuussutissarsiornermut Nukissiateqarnermut Ilisimatusarnermut
Suliffeqarnermullu Naalakkersuisup Jess Svane-p oqalugiaataa**

Ikinngutit!

Immitsinnut qanillinaveersaaralurluta maajip aallaqqaataasioqatigisinnaagassi qujanaq.

Corona! Maannamuugallartoq 2020-mut ilisarnaataasoq aallartitsissutiginnariartigu: mattusimaneq, angerlarsimaannaqqusaaneq – aammalu ataqatigiinneq! Pingaartumik kingulliullugu taaneqartoq maluginiassallugu pingaaruteqarpoq. Artornartorsiornermi tamatta nammaqatigiinnerput aammalu ataqatigiinnerput misigaara.

Isumaqaarpunga immitsinnut tuitsigut pattalaarsinnaasugut – immitsinnut qanillinaveersaarluta!

Inuussutissarsiortunut atugassarititaasut atoruminaatsumik inissisimanermi sapinngisamik pitsaanerpaamik pakkersimaarneqarnissaat Naalakkersuisut pingaartippaat.

Taamaattumik Naalakkersuisut piffissami sivikitsumi ikiorsiissutissat arlallit, suliffeqarfiit taarsiivigineqarnissamik qinnuteqarfigisinnaasaat, piviusunngortippaat. Ikiorsiissutissat taakkua suliffeqarnermi illuatungeriit qanimut suleqatigalugit ineriartortinneqarput aammalu ingerlaavartumik iluarsineqartarlutik. Suliffeqarnermi illuatungeriit tupinnaannartumik suleqataalluarnerannut, tusaaniartarnerannut, pilersitsiviulluurtumik isornartorsiuisarnerannut aammalu kinaassusersiunngitsumik isumasioqataanerannut immikkut ittumik annertuumik qutsavigerisuppakka.

Peqatigisaanik inuppassuit ikiorsiissutissat ingerlanneqarnissaannut sulerulussimasut – aammalu suleruluttut – annertuumik qujamasuuteqarfigigakkit oqaatigerusuppara.

Pisut ajornartorsiorfiulerneranni inuiaqatigiittut aammalu inuiattut qanoq annertutigisumik pisinnaalertartugut, Corona-p pilernerata takutippaa. Ataqatigiinneq nammaqatigiinnerlu kalaallit naleqartitarilluinnaraat, Nunarsuarmut uagutsinnullu paasinarsisipparput.

Aamma ungasissumut aningaasaqarnikkut ineriartortitsinissamut pilersaaruteqartussaagatta, maannakkut ajornartoornerup nalaani puiussanngilarput.

Taamaattumik nunarput ungasissumut allanngoriartortillugu anguniagaqarlutik Naalakkersuisut aallarertutput, tassani suliffissat pitsaasut, aningaasarsiarissaarfiusut

ilinniartitaanerillu siunnerfigalutigu. Aalisarnejq piniarnerlu kulturitsinnut ilaajuaannarsimavoq, taamaattuartaussaallunilu; kisianni peqatigisaanik allanik periarfissarsiusasugut, taamaalillutalu inuussutissarsiornejq inuiaqatigiillu oqimaaqatigiinnerusumik ineriartortissagigut, nunarsuarmi nutaaliaasumi uagutsinnut piunasaqaataavoq.

Aalisarnerup, piniarnerup aallaaniarnerullu akornanni allangorartitsinissap pingaaruteqarnera – aammalu inuussutissarsiutissap ataasiinnaap aallutinnginnissaa - siulitta paasiluarsimavaat. Taamaaqataanik inuussutissarsiornerput aammalu suliffeqarnejq allangorartissavagut.

Corona nunarsuaq tamakkerlugu takornariartitsinermik inuussutissarsiortunut ilungersunarsimagaluartoq, takornariartitsisarnejq tamatigut uteqqittuaannartarpoq aammalu nunamut sumulluunniit, angalasunut isumaat eqqoruminaassinnaasunut immikkut ittunik naammassisaqarsinnaasunut, annertoorujussuarmik isertitaqarfiusarluni. Aammalu Kalaallit Nunaat periarfissarsaarluartoq ilumoorlunga isumaqarpunga.

Pinngortitaq pileqqaarnermisuullu ittoq misiginiarlugu ornineqarsinnaasuni Kalaallit Nunaat Nunarsuarmi kisiartanngulersunut ilaavoq; aammalu kialuunniit misigisassarsiorusuttup Kalaallit Nunaannut *pinngitsoorani* tikeraartariaqalernissaa sulissutigaarput! Taamaattumik pingaaruteqarpoq takornariartitsisartut sapinngisamik amerlanerpaat ajornartorsiornejq sapinngisamik pitsaanerpaamik anigussagaat – taamaalilluta nunat tamalaat aallarteqqippata piareersimaniassagatta.

Tamatuma tungaanut nunatsinni nammineerluta takornariartalissasugut tapersersorusuppara. Taamaaliornitsinni ilaatigut angallassisartut, akunnittarfiit aamma takornariartitsisartut tapersersorsinnaavagut, ilatigullu pinngortitaq asseqanngitsoq alianaalluinnartorlu najorlugu nuannersua misigisinnaallugu.

Naalakkersuisut aamma ungasissumut allanik pilersaaruteqarput suliarineqaleruttortunik. Sermimik imermillu avammut nioqquteqarnerup, suliffissuarnik nukissiuutit ataavartut aallaavigalugit nukissiamik annertuumik atuisartunik pilerilersitsiniarnerup, uuliasiornerup gassisiornerullu kiisalu aatsitassarsiornerup il.il. iluanni suliassaqarfinni immikkuullarissuni inuussutissarsiornermi periusissianik arlalippassuarnik suliaraqarput aammalu atuutsitsilernissamik aallartitsilluta. Siunnerfigineqarpoq inuussutissarsiutinik suliffissanillu nutaanik, ungasissumi inuiaqatigiinni ineriartortitsisinnaasunik, ineriartortitsinissaq.

Naalakkersuisut 2019-imi aammalu 2020-p aallartinnerani ilaatigut sermimik imermillu avammut nioqquteqarnerup, takornariartitsisarnerup, uuliasiornerup gassisiornerullu kiisalu suliffissuit nukissiamik annertuumik atuisartut iluanni nittarsaassinernik annertuumik ingerlatsipput. Nittarsaassinerit Europa-mi kiisalu USA-mi niuerfinni annertuumi iluatsilluartumik ingerlanneqarput.

Corona pissutigalugu inissisimanerup nunarsuarmi aningaasaqarnermut sunniuteqarnera qaangiuteriarpat, inuussutissarsiornermi suliassaqarfinnik nutaanik nittarsaassisarneq ingerlaannassaaq.

Attaveqatigiinnermi pitsanngorsaasoqarnerani, ilinniartitaanerup qaffasinnerulernerani aammalu ataatsimut isigalugu Issittumut soqutiginnittoqarnerani, nunani tamalaani aningaasaliisartut pilerilersinneqarnissaat attassitiinnarnissaallu ajornaanginnerulertussaavoq. Tamatuma kingunerisaanik nunap karsianut akileraarutitigut isertitat annertusissapput, najukkani inuussutissarsiortut kaaviiartaqarnerulissallutik aammalu najukkani pitsaasunik aningaasarsiarissaarfiusunillu suliffissaqalissalluni.

Kikkut tamarmik imminnut ilaqtutaminnullu inuunerissaartinnissamut toqqissisimanissamullu periarfissaqartillugit siunissaqalersinnissaat pingaaruteqarpoq. Kinaluunniit imminut pilersornissamut periarfissaqartussaavoq aammalu sulinissamut periarfissaqanngitsunut akisussaaqataalluta nammaqatigiissaagut.

Neriutigalugu ulluinnaat nalinginnaasut uterfigeqqingajalissagigut – tamassi pilluaqqullusi 1. maj 2020 nalliussilluassagissi kissaappassi.

Inussiarnersumik inuulluaqqusillunga



Jess Svane

Inuussutissarsiornermut Nukissiuteqarnermut Iisimatusarnermut Suliffeqarnermullu Naalakkersuisoq